


দেশের ওটিটি প্ল্যাটফর্মে আসছে নতুন কনটেন্ট

প্রতি মাসে নতুন সিনেমা বা ওয়েব সিরিজের জন্য দর্শকের নজর থাকে ওটিটি প্ল্যাটফর্মগুলোতে। মাস জুড়ে দেশ-বিদেশের বিভিন্ন প্ল্যাটফর্মে মুক্তি পায় নানা দেশের, নানা ভাষার কনটেন্ট। ওটিটি প্ল্যাটফর্মে নতুন মুক্তি পাওয়া নতুন কিছু কনটেন্ট সম্পর্কে জানাচ্ছেন সীমান্ত।



তুফান - চরকি ও হইচই

চলতি বছরের কোরবানি ঙ্গে সুপারস্টার শাকিব খানকে নিয়ে 'তুফান' নির্মাণ করে সাড়া ফেলেন রায়হান রাফী। ১৭ জুন দেশের প্রেক্ষাগৃহে মুক্তি পায় শাকিব খান অভিনীত সিনেমাটি। ব্যাপক জনপ্রিয়তার কারণে অনেকই ছবিটি দেখার সুযোগ পাননি। তবে সেই আক্ষেপ দূর করেন নির্মাতা, সিনেমাটি একইদিনে দুই বাংলার দুই ওটিটি প্ল্যাটফর্ম 'চরকি' এবং 'হইচই' এ ১৯ সেপ্টেম্বর মুক্তি পায় ছবিটি। 'তুফান' সিনেমার মাধ্যমে শাকিব খানের সঙ্গে জুটি বেঁধে দীর্ঘদিন পর সিনেমায় ফিরেছেন মাসুমা রহমান নাবিলা। সেই সঙ্গে ছিলেন ওপার বাংলার জনপ্রিয় অভিনেত্রী মিমি চক্রবর্তী। চঞ্চল চৌধুরীকেও দর্শক নতুন রূপে পেয়েছে এই সিনেমার মধ্যে দিয়ে। এ সিনেমায় আরও অভিনয় করেছেন গাজী রাকায়েত, মিশা সওদাগর, ফজলুর রহমান বাবু, শহীদুজ্জামান সেলিম, সালাহউদ্দিন লাভলু, হাসনাত রিপন, গাউসুল আলম শাওনসহ আরও অনেকেই।



মায়্যা - বিজ্ঞ

জনপ্রিয় নির্মাতা রায়হান রাফির খিলার জনরার ওয়েব ফিল্ম 'মায়্যা' ওটিটি প্ল্যাটফর্ম বিজ্ঞ-এ মুক্তি পায় ৩০ সেপ্টেম্বর। ওয়েব ফিল্মটি তৈরি হয়েছে পারিবারিক গল্প নিয়ে। দাম্পত্যজীবনে মানুষের অনেক সমস্যা থাকে, তারপরও তারা পরস্পরকে ভালোবেসে মায়ার বাঁধনে থেকে যায়। মায়ার গল্পে এটাই দেখাতে চেয়েছেন নির্মাতা। মাদক, নারীর সংগ্রাম, পারিবারিক টানাপোড়েন, নানা দিকে আলো ফেলা হয়েছে গল্পে। কেন্দ্রীয় দুই চরিত্রে অভিনয় করেছেন মামনুন ইমন ও সারিকা সাবরিন। রায়হান রাফির পরিচালনায় দীর্ঘ ৭ বছর পর একসাথে অভিনয় করেছেন ইমন ও সারিকা। এছাড়াও অভিনয় করেছেন রাশেদা চৌধুরী, নাদের চৌধুরী, হাসনাত রিপন, মুনতাহা এমেলিয়া প্রমুখ। নির্মাতার সঙ্গে চিত্রনাট্য লিখেছেন মেহেদী হাসান মুন ও সাইদুজ্জামান আহাদ।




সিটিআরএল - নেটফ্লিক্স

অভিনেত্রী হিসেবে অনন্যা পাণ্ডের খুব একটা সুখ্যাতি নেই, তবে এই ওয়েব ফিল্ম আপনি দেখতে পারেন নির্মাতার ওপর ভরসা করে। ব্যাপক প্রশংসিত জুবলির পর ওটিটিতে নতুন কাজ 'সিটিআরএল' নিয়ে হাজির হয়েছেন বিক্রমাদিত্য মোতওয়ানি যা ৪ অক্টোবর নেটফ্লিক্সে মুক্তি পাচ্ছে। গল্পে নেলা এবং জো বিখ্যাত সেলিব্রিটি দম্পতি, তবে হঠাৎ তারা একে অপরের সাথে প্রতারণা করে। তখন তারা সেই স্মৃতি ভুলে যাওয়ার জন্য এআই অ্যাপ ব্যবহার করে যতক্ষণ না এটি নিয়ন্ত্রণে আসে। তারা কী পারবে? তাদের স্মৃতিগুলো ভুলতে নাকি ঘটবে ভিন্ন কোনো ঘটনা, এই নিয়েই গল্পটি এগোয়। এই খিলার ছবিতে আছেন বিহান সম্রাট দেবিকা বৎস, কামাক্ষী ভাট, সুচিতা ত্রিবেদীসহ আরও অনেকে।



সালেমস লট - এইচবিও ম্যাক্স

স্টিফেন কিংয়ের উপন্যাস অবলম্বনে নির্মিত 'সালেমস লট' সিনেমা। গল্পে লেখক বেন মিয়ার্স এক রহস্যের সন্ধানে জেরুজালেমের লটে তার শৈশবের বাড়িতে ফিরে আসেন, কারণ তার নিজের শহরে এক রক্তপিপাসু ভ্যাম্পায়ার আবির্ভাব হয় যে সকল মানুষের রক্ত চুষে খায়। লেখক কী পারবেন ভ্যাম্পায়ারকে হারাতে? গ্যারি ডাবারম্যান নির্মিত ভৌতিক সিনেমাটিতে অভিনয় করেন লুইস পুলম্যান, ম্যাকেন্জি লেই, বিল ক্যাম্পসহ আরও অনেকে। ৩ অক্টোবর ওটিটি প্ল্যাটফর্ম এইচবিও ম্যাক্স এ দেখা যাবে সিনেমাটি।



আপরাইজিং - নেটফ্লিক্স

বুসান আন্তর্জাতিক চলচ্চিত্র উৎসব এর ২৯তম আসরের পর্দা উঠছে 'আপরাইজিং' সিনেমা প্রদর্শিত হওয়ার মধ্য দিয়ে। এই প্রথম কোনো স্ট্রিমিং প্ল্যাটফর্মের সিনেমাকে বুসান আন্তর্জাতিক চলচ্চিত্র উৎসবের উদ্বোধনী সিনেমা হিসেবে বেছে নেওয়া হয়েছে। ১১ অক্টোবর সিনেমাটি ওটিটি প্ল্যাটফর্ম নেটফ্লিক্স এ মুক্তি পাবে। জোসেন রাজবংশ নিয়ে তৈরি সিনেমাটির মূল দুই চরিত্রে অভিনয় করেছেন পার্ক জিউন মিন ও গাং ডং উন। 'আপরাইজিং' দিয়ে প্রথমবার নেটফ্লিক্সের সঙ্গে কাজ করলেন অস্কারজয়ী দক্ষিণ কোরীয় নির্মাতা, প্রযোজক ও চিত্রনাট্যকার পার্ক চ্যান উক। এই সিনেমার প্রযোজক ও সহচিত্রনাট্যকার তিনি।



কাবেরী - হইচই

৮ অক্টোবর ওটিটি প্ল্যাটফর্ম হইচই এ মুক্তি পাচ্ছে সৌভিক কুন্ডু পরিচালিত 'কাবেরী' ওয়েব সিরিজ। নারীকেন্দ্রীক ওয়েব সিরিজে একজন শিক্ষিকার চরিত্রে অভিনয় করেছেন পাওলি দাম। হইচইয়ের সঙ্গে প্রথমবার জুটি বাঁধছেন অভিনেত্রী। তার সঙ্গে দেখা যাবে সৌরভ চক্রবর্তীকে। পাওলি দামের চরিত্রটি গার্হস্থ্য হিংসার শিকার। শিক্ষিকার সঙ্গে এক ছাত্রীর সম্পর্কে কেন্দ্র করে গল্প এগিয়েছে। আপাত ভীর্ণ স্বভাবের চরিত্রটি শেষ পর্যন্ত কী ভাবে ঘুরে দাঁড়ায়, তার উত্তর দেবে এই সিরিজ। ওয়েব সিরিজটিতে বিভিন্ন চরিত্রে অভিনয় করেন সৌরভ চক্রবর্তী, চন্দন সেন, শংকর দেবনাথ, ফালগুনী চট্টোপাধ্যায়সহ আরও অনেকে। এ সিরিজের মাধ্যমেই ওটিটিতে হাতেখড়ি হতে চলেছে পরিচালক সৌভিকের।

তাজা খবর সিজন ২ - ডিজনি হটস্টার

২৭ সেপ্টেম্বর ওটিটি প্ল্যাটফর্ম ডিজনি হটস্টারে মুক্তি পেয়েছে হিমাক্ষ গর নির্মিত সিরিজ 'তাজা খবর' সিজন ২। প্রথম সিজনে ব্যাপক আলোচিত হওয়ার কারণে নির্মাতা সিরিজটির দ্বিতীয় কিস্তি নিয়ে আসেন। জনপ্রিয় ইউটিউবার ভুবন বাম এই সিরিজ দিয়ে ওটিটিতে অভিষিক্ত হয়েছিলেন, দ্বিতীয় সিজনেও তিনি মূল চরিত্রে। অতিপ্রাকৃত ক্ষমতার অধিকারী হওয়ায় একের পর এক অপ্রত্যাশিত ঘটনা ঘটতে থাকে ভুবনের জীবনে। ভবিষ্যৎ দেখতে পায় সে, কিন্তু এখন আর তার পূর্বানুমান সত্য হয় না। ভাষ্য নামের উচ্চাভিলাষী এক ব্যক্তিকে ঘিরে সিরিজের গল্প। নিজের লক্ষ্য পূরণে অটল ভাষ্য। অদ্ভুতভাবে ভবিষ্যৎ বুঝতে পারে ভাষ্য, নিজের সেই ক্ষমতাবলে প্রভাব বিস্তার করতে পারে আশপাশের মানুষের ওপর। ১২ পর্বের এই সিরিজটিতে বিভিন্ন চরিত্রে অভিনয় করেন বসন্ত গওদে, শ্রীয়া পিলগাওঙ্কর, জে ডি চক্রবেদীসহ আরও অনেকে।

